

嘉慶松江府志

松江府志卷五十九

古今人傳十一

國朝

胡寶琮字泰舒世籍徽州府歙縣父廷對爲婁縣教諭  
寶琮隨父宦學遂家焉舉雍正元年鄉薦乾隆二年考  
授內閣中書入軍機裏行寶琮博洽通世務凡直省土  
俗官職兵制因革利弊無不詳覈鄂文端爾泰深倚重  
之時有

旨度地奉天三省奏請以寶琮同往自土默特噶爾沁諸  
部落經醫無間松花黑龍二江行二萬二千餘里審其

山川形勢辨其物宜瞭如指掌復

命陞內閣侍讀

特旨擢福建道監察御史在諫垣四載遇事侃侃知無不言轉戶科給事中擢順天府丞時金川土番跳梁

上命大學士傅恆經略軍務寶琮從行羽檄旁午瘴毒交侵或三晝夜一食竭力奉公不知勞勩凱旋以軍功陞府尹轉宗人府丞尋擢都察院左副都御史奉

命讞獄中州開釋無辜有神明之稱晉兵部右侍郎仍管府尹事尋擢山西巡撫歷調湖南江西河南諸省所至理冤獄飭戎行招飢民糾墨吏謹關隘除奸豪其尤大

者在江西兩任則編湖船以救行旅之患通商販以濟江浙之荒嚴廣信開采之禁以杜利端絕奸宄兩撫豫省則籌賑卹以拯被溺之民亟疏濬以善防河之策一時幹支諸河六十七道咸就深通涸出民田數萬頃最後堵塞楊橋決口救五十餘州縣之民速告合龍大工底定以過勞成疾卒於官年七十贈太子太保兵部尙書

予祭葬諡恪靖兄寶璫號象虛後改名二樂乾隆丙辰薦舉鴻博十二年舉人三十六年會試榜後

特恩賜翰林院檢討弟寶琳山東鹽法道子鼎蓉自有傳

寶璫子鼎臣與寶璫同榜舉人廣東試用鹽大使

妻志

張仕遇字秉均華亭人軌端曾孫祖宮父之普傳見前  
仕遇雍正元年第進士選庶吉士改吏部主事陞員外  
郎授雲南曲靖知府以熟練部務奏留尋陞郎中兼文  
選考功二司奸弊剔除吏胥無得上下其手旋擢御史  
一切條奏如接任州縣緝兇應分別處分諱盜諱命道  
府等官徇隱疎忽分別議處舉人候選截取仍令該撫  
驗看吏員考職弊竇滋多請改本省巡撫就近考試數  
事俱下部議允行乙卯典試江右仕遇素爲高安朱文  
端軾器重文端孫五人與試仕遇皆不錄及反謁文端

有加禮仕遇亦弗爲謝時人兩賢之提學湖南有故交以微言探意仕遇指洞庭湖爲誓客慙而退任滿調四川學政選古今文若干卷鐫布蜀中文風丕變後以楚任苗生滋事註吏議罷官歸卒年七十一

婁志

吳王坦字衷平婁縣人雍正元年進士由庶吉士改官行人出知廣西永福縣永福猺獠雜處彫敝難治勤墾辟崇教化民大悅權知義寧前令以苗亂入山招撫被戕王坦至集吏民諭以大義分門守禦賊知有備他竄薦舉博學宏詞行取擢平樂府同知旋以病假歸年六

十七卒

婁志

朱鑑字旦平上海人居周浦枕葑經史爲文雅正孫學士勦稱爲寒碧後一人雍正元年成進士年已六十一選寧國府教授寧士執經問業他郡來學者亦奉爲導師焉子良裘字治子雍正二年進士選庶吉士改編修朱文端軾方學士苞皆器重之嘗奉

敕校刊十三經進周易注疏摺子奉

旨附編末乾隆六年充四川正考官歷官少詹事

南匯志

沈于鵬字文在華亭人葉孫雍正元年舉人官石堰場大使以廉介自持子維鏞字荆範乾隆二十五年舉人授陝西鳳翔縣有政聲嘗集坡公書刻鳳翔八觀詩以

憂歸自號石村山人工篆隸著有石村詩鈔

金應元字霖舒上海人弱冠工文詞以歲貢薦入

武英殿纂修圖書集成登雍正二年順天鄉薦除兩淮運  
判好以文章獎勵後學士之貧者移學署名給膏火贍  
之辦賑及疏濬中河惠卹商竈政聲籍甚尋轉運同引  
疾歸里與同邑凌侍郎如煥時相倡和卒年七十五著  
有種書圃詩文集

上海志

周吉士字藹公婁縣人思兼六世孫雍正二年進士由  
庶吉士授刑部員外郎陞郎中兼提牢廳事嚴束獄卒  
毋虐罪囚躬給衣糧周視羣桎冬月被敝裘一隸攜燈



夜巡行園土中曉鐘動始返冰索索滿身也所識爰書  
當於法而止以念母請假歸環堵依然餽粥不繼海上  
富人有喪持五百金請往護視吉士笑不應其人持金  
去曉家人曰吾豈不知留金可佐衣食顧三百年來世  
守遺訓不可一日辱先人之名其操履如此性孝友母  
疾露禱北辰兄弟同居至老彌篤學者稱爲孝潔先生  
志

唐班字晚野上海人居四竈雍正二年進士選山東鄒  
平縣以母老呈改教職選鳳陽教授時泰安相國趙公  
撫皖延主敬敷書院遵朱子白鹿遺規訓士士風翕然

終養服闋補池州教授兩屆計典以卓異薦力辭旋告  
歸顏其齋曰誦耘處鍵戶授經從游者不下四五百人  
學者稱柴溪先生卒年八十一字曰馭字義伯邑增生  
次承華季芬自有傳

南匯志

馬嚴字敬六上海人雍正二年進士幼穎悟讀書過目  
成誦執親喪盡哀祖年高日護視衣食冬夜必同寢而  
溫之未授官卒

南匯志

張忠震字虎臣婁縣人父道孔任歸安令有政聲忠震  
三歲而孤家窶貧生母俞攜之改適稍長卽不願居住  
依從祖某晉州官署入宛平籍補諸生遂家京師日或

不再食讀書無閒晨晦有貽以金十銖者聞夜哭甚哀  
旦知鄰有母喪不能營漏柎卽舉以授之雍正元年領  
鄉薦明年會試以春秋冠其房授湖廣石門縣知縣在  
職十年威惠並著以最擢禮部主事晉員外郎奉  
命往賑江南事竣還京

特授撫州府知府尋被劾奉

旨還部補戶部員外升工部郎中調製造庫兼管寶錢局  
充會典館纂修官忠震性剛直不能事上官遷轉中外  
歷三十年不名一錢卒年八十一

王興吾字宗之華亭人父圖煒歷官戶部郎中興吾少

穎敏祖鴻緒奇之錫以名與字曰興吾宗者是子也成  
雍正五年進士改庶吉士授編修乾隆三年擢廣西道  
監察御史巡視西城敷奏皆極剴切出視南漕漕政自  
明宣德閒以長運爲定法然餘耗竝載往往抑勒輕齎  
因短價而賠墊興吾悉釐其弊又上言臨時撈淺起撥  
不若先事而圖凡可漕之水可引之泉豫爲醴濬而堰  
牖之使得常留五尺許不特運丁無虞起撥而漕運亦  
倍迅事多施行使還遷吏科給事中尋改戶科掌印給  
事中出爲河南按察使俗尙拳勇搥鬪之習興吾繩其  
豪猾置諸法境內帖然旋擢布政使時開歸陳許諸州

郡大水興吾悉心賑卹民沾實惠丁父憂去將服闋卽家起復江西布政使在豫章七年多善政兩遇官兵過省民無騷騷歲歉撥運賑米數萬民不至懸罄瑞州新昌寧州棚民雜處密爲偵察贊誠悉靖二十二年

召爲吏部侍郎入朝抵東昌感暑卒於舟次時年五十五

婁志

王葉滋字槐青婁縣人鍾彥孫少失怙恃以兄師旦爲師弱冠籍諸生家貧授徒務爲體用之學大學士朱軾時爲浙撫延教其子深器重之及軾內陞出鎮山陝咸與偕雍正元年明史館開

詔舉諸生有文行者入館纂修載旨薦錄用舉順天鄉試  
會福敏自浙撫遷楚督奉

命往贊其幕丁未禮闈試畢

召詢全楚吏治民生利弊奏對詳晰

世宗大說謂幕府需人復令馳傳往迨榜發有名未與  
殿試

特賜二甲第十名進士卽授胡廣常德知府常德衝繁大  
郡例新府至各行戶換照入四千金葉滋拒不受仍令  
用前照或言盍啓臺司充公費葉滋曰歸公必按歲徵  
納累民多一正供矣勒石著爲令值水災潰防親履修

木  
築隄工完固辰州有關稅木時建議移關常德可網七  
百里木稅葉滋恐累民請仍舊制至其行法雖豪貴犯  
者不貸沅江民譙氏八世同居爲請旌舉諸生陳悌爲  
武平令貴金馬爲上蔡令劉樵爲清平令竝著循聲武  
陵縣役侵公帑三千金株連六十餘人繫獄責償死者  
殆半葉滋捐俸以免之連攝岳辰二府岳常道篆擢分  
巡辰永靖道時苗疆初闢至則清林箐增汎堠規模肅  
然所轄綏寧城步犬牙黔省兇苗屢相讎殺乃率數騎  
循行苗寨苗人歡迎謂上官親我因召諸頭目集教場  
行賞宣

上德意勸以禮義同鎮帥閱武大耀軍容羣苗帖服署按察使決獄平允尋授糧儲道各屬解送漕費例悉以歸公黔苗方蠢動

大兵進剿飛芻輓粟剋期而辦綏寧苗應黔爲逆條陳撫苗事宜皆中大吏指悉以苗事相屬因觸嵐霧致疾卒年五十五葉滋博雅工古文辭所著多爲藝林傳誦子永椿字方千乾隆十二年舉人選無爲州學正調婺源教諭以江永有功經學言於學使者從祀朱紫陽祠前後司鐸十年與諸生講學論文不妄涉細事年五十九卒著有古巢知非諸稿

妻志



王丕烈字述文婁縣人雍正五年進士由庶吉士授編修尋遷御史巡視通州漕務凡所建白悉見施行癸丑會試充同考官轉吏科給事中視廣韶學政識刑部尙書莊有恭於諸生中轉戶科補福建泉永道乾隆六年擢福建按察使時有詔安縣民人聚黨煽動及漳浦奸民戕害縣令兩大案丕烈至甫一月盡獲渠魁閩地多高原雨澤愆期田禾焦卷丕烈爲立補種雜糧及通融平糶之法奏請頒行七年調河南按察使禁重刑嚴固戶開築溝渠隄堰又酌定小鹽禁例以裨窮黎民甚賴之十年丁內艱歸卒於家長子芳字吹和乾隆九年舉

人荆溪縣教諭

襄志

葉承字子敬南匯人棠子雍正五年進士授常山令改授貴池教諭素嗜學課諸生孳孳不倦罷歸後設教里中多所成就工小楷善寫山水著有松亭詩文鈔若干卷子抱崧字方宣諸生茗穎秀發賦才絕麗四方名士多與之游乙酉春

南巡召試第二等梁階平學使將以拔萃科待之而抱崧

已患瘵死

南匯志

王祖庚字孫同金山人王文恭公頊齡孫雍正五年進士授山西興縣令乾隆丙辰薦舉鴻博充

武英殿經史館校書旋出知隰州遷保定府知府終寧國府知府著有勵齋詩鈔

陸瀛亮字熙載上海人鳴珂從子幼有異稟長善文詞儀封張宗伯撫吳時品題佳士拔入紫陽書院肄業名噪一時雍正七年登北雍鄉薦輦下鉅公爭欲得之會試不售需次家居以詩文自娛人奉爲文壇尊宿子秉紹字繩山亦有文名乾隆庚午副榜

上海志

陳鍾字玉廷婁縣人雍正七年舉人考授內閣中書工詩文師事焦徵君袁熹而與曹黃門一士爲友四焉齋會課選刻鍾文最多所居不蔽風雨厲節彌堅年六十

餘卒同時陳岳字懷峯雍正二年舉人才名與鍾埈所居復同巷人稱小塔前二陳云

林令旭字豫仲金山人晚居谷陽門菱荷潭景暘五世孫也父企俊有隱德令旭成雍正八年進士由庶吉士授編修累陞太常寺卿督學順天卒於涿州試院令旭器識宏遠抱經濟才當未遇時怡賢親王奉

世宗命延於邸既成進士入翰林仍教讀嗣王有成官編修時請假省父蒙

恩特賜人蔭文綺以優高年朝士榮之其視學也單車按部士心悅服諄諄以朱子小學爲多士訓所至留心書

院及古賢祠宇傾圯者輒捐俸飭修平生好經史長於  
詩歌兼善繪事子五人四德堦乾隆元年舉人早卒從  
子見龍乾隆六年舉人廣東花縣知縣

妻志

曹一士字謬廷上海人年十五補青浦縣諸生雍正元  
年拔貢四年舉順天鄉試五年授如皋教諭八年成進  
士改庶吉士尋充順天壬子鄉試同考官癸丑散館授  
編修充一統志纂修官乙卯充文穎館纂修官五月改  
山東道監察御史首言督撫者守令之倡願其中有賢  
有能賢能兼者上也賢而不足於能者次之能有餘而  
賢不足者又其次也督撫之爲賢爲能視其所舉而瞭

如今督撫之保題守令約有數端曰年力富強辦事勤  
慎不避嫌怨其實迹則曰錢糧無欠開墾多方善捕盜  
賊果如其言洵能吏也乃未幾而或以贓汙著或以殘  
刻聞舉所謂貪吏酷吏無不出於能吏之中彼夫吏之  
賢者惓惓無華慙怛愛人事上不爲詭隨吏民同聲謂  
之不煩度今世亦不少其人而督撫薦剡曾未及此得  
毋反視賢吏爲無能邪抑以能吏卽賢吏邪臣恐所謂  
能者非真能也以趨走便利而謂之能則老成者爲遲  
鈍矣以應對捷給而謂之能則木訥者爲迂疏矣以逞  
才喜事而謂之能則鎮靜者爲怠緩矣以武健嚴酷不

恤人言而謂之能則勞於撫字拙於鍛鍊者謂之沽名釣譽才力不及而撫拾細故以罷黜之矣臣以爲今之督撫明作有功之意多而惇大成裕之道少損下益上之事多而損上益下之義少此治體所關也

皇上於丈量開墾割裂州縣改調牧令一切紛擾之舉皆行罷革所慮爲督撫者執其成心且飾非以自護意爲迎合將姑息以偷安臣敢請

皇上特頒諭旨於精明嚴肅之中布優游寬大之政使能者務勉於賢而賢者益勵於能是知人之哲卽安民之惠也疏入

上卽播告直省又請寬比附妖言之獄謂往者造作語言  
顯有逆迹如戴名世汪景祺等

聖祖

世宗因其自蹈大逆而誅之非得已也若語涉疑似如陳  
鵬年游虎邱詩一案

聖祖特示九卿以爲古來誣陷善類大率如此如神之哲  
洞察隱微可爲萬世法則比年以來小人往往挾睚眦  
之怨借影響之詞有司見事生風多方窮鞫殊非  
國家義以正法仁以包蒙之意伏讀

皇上諭旨凡奏疏中從前避忌之事一槩埽除仰見



聖明廓然大度臣竊謂

大廷之章奏尙捐忌諱則在野之筆札焉用吹求請

敕下直省嗣後凡有舉首文字者苟無的確蹤迹以所告  
本人之罪依例反坐以爲挾仇誣告者戒庶文字之累  
可蠲告訐之風可息

上亦如所請轉工科給事中又言兩浙之場課宜捐帶徵  
之漕米宜免工料之價直宜平凡所建白皆有益於世  
事民生朝野想望風采以爲行將大用未幾卒於官年

五十九著有四焉齋詩文集

青浦志參全祖  
望姑埼亭集

顧成天字良哉南隄人昌祚子康熙五十六年舉人潛

心濂洛關閩之旨公車屢躋年將六十會

聖祖仁皇帝升遐成天作輓詩六章哀痛懇摯

世宗憲皇帝以爲居心仁厚秉性善良

特召見奏對良久賜居澄懷園之花語山房直

皇子講讀八年庚戌

欽賜進士授編修尋告歸

高宗純皇帝登極成天入

覲供職晉侍講以老乞休居東浦草堂沈思撰述博涉唐  
宋諸人涯埃而清矯拔俗自成一家有請業者啓迪無  
倦色年八十二卒初成天入直時呈所著東浦草堂文

集蒙

恩賜序言其忠孝之心存於中誠敬之心積於內故爲文  
衷之以至性準之以聖道約之以規矩澤之以經史言理  
言事皆樸實而光采自不可遏又

賜題鏡容詩一律

宸衷契合

奎文爛然尤非尋常稽古之榮所能及子三賓日賓鴻幼

子賓臣年七十三生後官至霸州知州

附錄

徐良宇乘萬初名觀光婁縣人雍正十年登鄉薦考授  
內閣中書遷廣西慶遠同知歷官四川夔州府知府所

任有著稱性真樸與人交無面背語湛深學術尤精八  
法致仕後客都門法源寺四方求書者塞門限雲閒董  
張兩文敏後殆眇其匹晚居笏水之陽年七十餘卒  
焦以敬字惺持金山人袁熹子康熙五十六年舉人雍  
正十一年

性理之學同郡張文敏照疏薦

對稱旨

賜進士選庶吉士乾隆四年改授山西洪洞縣知縣三  
載改屯留洪洞久旱渴雨踰半載以敬甫下車步禱輒  
應閩邑稱誠感晉省丁銀額征向因紳衿優免致輕重

失均大爲貧戶累以敬熟察輿情詳請均攤田畝殫心  
立法不爲權貴所撓積年重困一旦豁除鄰邑竝著爲  
式建慎交書院捐俸延師課士士風丕變其在屯留聽  
斷得情以病乞歸卒生平研究性理鉤探祕奧詩古文  
宗尙廬陵著有文集輿中草等十卷

金山志

吳永雯字季青婁縣人父宗煥由歲貢生考教習候補  
知縣永雯雍正十三年舉人後以中式明通榜官太湖  
縣教諭訓飭士子先德行後文藝任事十餘年文風日  
進子志遠字毅哉金山衛學生歲科試輒高等嘗客嶺  
外三十餘年品行醇謹工詩詞著有湛溪綺語及粵游

詞草行世

曹復元字興門婁縣人金山籍乾隆元年舉人屢上春官不第選授河南林縣改溧陽教諭歲饑查賑作五言古十九首以代鄭俠流民之圖當事爲之惻然造就及門甚多年八十九卒子湯鼎字念之國學生博學工詩著有筆畊雜志齊物類鈔咫聞暇錄諸書

婁志

黃槐字晉望上海人乾隆元年舉於鄉明年成進士授松陽令值歲饑賑粥平糶民賴以生創書院延名師決疑獄無枉縱服闕補河源令三年以病告憲司重其學

奏改教職選徐州教授卒於官

南匯志

喬光烈字敬亭上海人明忠烈一琦從曾孫乾隆二年  
進士卽用陝西寶雞縣知縣到官閱獄囚四百餘人分  
別減釋淹滯頓疏編律令爲便民條約家喻戶曉犯者  
遂少故事商人助公費民戶辦官餐悉除之李村多田  
無水捐貲鑿石穿土引汧水成渠人稱惠民渠勸民墾  
荒不宜稼者種藥民獲大利教民蠶事郊原曠野藝桑  
萬株人號喬公桑取江南木棉花子教以鋤藝紡織子  
午谷居民數千家椎魯不學築舍延師教之讀書秦鞏  
流民入境內設糜散藥麥熟歸之治陳倉棧道偏橋皆  
夾以石施石闌馬牆行旅無恐調渭南權乾州知州尋

陞同州府知府所在有聲如創馮翊書院定夾沙灘界  
除潼關雜役修津河判華州渠道減唐陵地租政績尤  
著巡撫陳宏謀屢疏薦之擢山西河東道所屬歲災詳  
請動平絳溢米十六萬豫米二萬全活無算又請濬涑  
水姚暹五姓諸河變汙萊爲沃壤者四百里擢長蘆鹽  
運使改授直隸按察使數月積案頓清勘漳衛決河陳  
奏分消零消二法又上賑卹急務十六條皆奉

旨允行擢河南布政使時黃河楊橋口決水浸汴城甚急  
光烈親率官弁涉水駐隄撈救難民以萬計總理工賑  
動帑至二百三十萬擢貴州巡撫加兵部侍郎調任湖



南整飭吏治軫念民艱有凶苗仇殺三命光烈奏請按  
誅如法著爲令奏動帑修嶽麓書院奏辦洞庭湖留拆  
私垸以卹貧民以平水患時寶慶知府某有罪自縊部  
議落職仍起甘肅布政使履任兩月力疾清釐展賑事  
宜手批公牘端坐而逝光烈居官三十年忠勤自矢唯  
以民事爲急由牧令至封疆依然儒素廉聲上達

宸聽著有最樂堂文集子鍾沂候選光祿寺典簿鍾吳癸  
未進士任岷州知州鍾霍西城兵馬司副指揮早年卒

上海志

喬照字書田上海人光烈從弟少孤貧讀書長英偉習

騎射舉乾隆二年武科進士歷官山西靖安營都司遇  
儉歲助理賑務累擢甘肅金塔寺營副將赴伊犁屯田  
陞涼州鎮總兵仍留伊犁轄屯務前後十五年

賜戴花翎擢安西提督調浙江卒於官年七十三照練達  
戎行宣勞萬里暇輒事吟詠有古儒將風云

上海志

楊夢元字鶴江婁縣人乾隆元年進士授陵縣知縣丁  
艱歸服闋補樂昌詩文爲時主臬前後居官數十餘年  
沒後旅櫬蕭條同官經紀其喪子麗正麗黃並以諸生  
世其家

婁志

金濬字鈍餘青浦人父世祺以孝義重於時濬乾隆三

年登鄉薦十四年中明通榜選建德縣教諭以事被議

歸究心詩古文而古文尤深造以清峭簡潔爲宗

青浦志

戴駿龐字軼倫婁縣人雍正十三年拔貢乾隆三年舉  
人工制舉業專究理法不爲纖仄浮夸之習人有質以  
藝者斷斷然掎摭利病有道之氣望而畏之居鄉教授  
從游者皆知名於時卒年七十八

婁志

張孝源字儼思婁縣人占籍宛平父忠仁字元長以孝  
友稱於鄉孝源乾隆三年領鄉薦選永年縣教諭七年  
中明通榜仍回任屢攝縣事以能稱秩滿卓薦奉

旨以知縣用尋遭父喪服除未赴卒年四十五孝源性寬

厚工制藝爲學博十年訓士有方士子問業者甚衆某  
生以通官租令徵之夏楚孝源謂令曰此生貧耳鞭撻  
甯越以立威名我不爲也捐貲代償士愈益親附工書  
法張尙書照極稱之

婁志

謝穎元字霞軒婁縣人乾隆四年進士選嘉魚令調江  
夏擢霑益州知州歷官景東府同知在嘉魚創書院捕  
石塘積匪擒蓮子汛巨盜在江夏審辦馬朝柱逆案廉  
能著荆楚閒霑益米物交市市僧以意低昂穎元悉取  
斗斛較準印烙賣鋪不得售其欺最後在景東復書院  
增學舍請停土練調發所至著稱著有春草堂詩集

許椿字董園婁縣人嘉善籍性剛儻好讀書警悟絕人  
登乾隆六年浙江榜授四川內江令有惠政會金曾不  
靖

大兵進剿軍務旁午憲司檄辦登春糧站死木果木之難  
事聞

特恩加贈道銜

賜祭葬入祀昭忠祠子煌以難廕歷仕山西武鄉安邑知

縣婁志

林見龍字乾符金山人令旭從子乾隆六年順天舉人  
性孝友丁父艱哀毀骨立事祖如父奉母盡色養庚午

謁選得花縣單車之任以經術佐吏治駱某毆殺人嫁禍於族人爲察其冤出之王申母病告歸越四載母沒哀傷成疾未終喪卒人以爲死孝云子克銓字掌平中允黃之雋以女孫妻之爲諸生有名

陸秉笏字長卿上海人瀛齡子幼承家學弱冠卽有聲賢序乾隆六年順天舉人持已嚴正待人寬和樂人爲善事不惜反覆勸導里黨咸欽重之晚年性益恬澹不就選格以子錫熊貴封如其官閉戶蕭然安貧樂道旣以齒德重鄉閭而文望又足以副之遠近奉爲老尊宿著有雲閒殉節諸臣傳贊傳經書屋詩文稿乾隆癸卯

重修邑志當事請爲總修正譌補缺指示居多惜未戴  
事卒年七十入子錫熊自有傳

上海志

張端木字昆喬上海人煜子能文章善書乾隆七年進  
士歷任浙江金華鎮海常山臨海等縣以明幹稱乙酉  
充同考官所薦多知名士罷官歸不名一錢惟蓄古錢  
甚多著錢錄十二卷張林雜記芙蓉亭勦說東湖綴筆  
千字文詒陶朱山館詩文集共十餘種藏於家

夏益萬字遣塵金山人乾隆九年舉人事親以孝聞澹  
於仕進生平著作甚富有古詩注咫聞集玩意樓稿各  
若干卷

婁志

喬龍字敷在上海人乾隆九年舉人品行端謹學術湛  
深出其門者多知名晚年深於禪學屢以果報勉人著  
有傳經堂文集

上海志

趙頤字百期青浦人五歲遭祖母喪卽能成禮以背誦  
十三經補縣學生乾隆十年成進士署江西上高縣持  
法平允境內熙然踰年調分宜公廉明斷暇日延諸生  
講道論學移晷忘倦巡撫吳斯盛稱爲愛民如子愛才  
如命以事去職民德之祀袁州名宦祠著有詩文合草

青浦志

蔡鴻業字廣勤系出西山先生先世由閩遷華亭遂爲



華亭人父燦以醫名鴻業登乾隆十三年進士授刑部主事晉員外郎中在秋曹十三年持法稱平於案情律意悉心探究決疑伸枉如神明擢廣東糧道未一年召拜署刑部侍郎蓋

上素知鴻業治獄明允且資格無出其右故有是

命旋授副都御史仍攝刑部事補授本部右侍郎會以粵省糧驛事被議詞連前官與梁文定國治同赴粵就覈事白吏議褫職

特恩授鞏秦階道踰年擢甘肅按察使尋升布政使以母憂歸卒年六十○生平宅心仁厚歷官中外二十餘年

老屋蕭然不異寒賤與人交必信必誠尤爲遠近推重  
爲郎官時纂修律例會典丙子丁丑鄉會試同考官庚  
辰典試湖北所拔稱得人晚葺數椽於皇甫林不入城  
府謁當事自號林西老人著有西林詩稿

梁文定國  
治撰墓志

鈕思恪字作賓上海人其先有正炳者年十七喪父里  
豪某謂孺子可欺下石焉正炳挺身訟得白久之有鬻  
女者卽豪女孫正炳曰吾不忍復修怨卒善遣之無弟  
妹有恩戚友有沒世受其推解者思恪孤介沈默與衆  
異趨以舉人中禮部明通榜授霍山教諭乾隆十三年  
成進士改內閣中書以母老不就卒於家著有晚香堂

文稿從孫芬字竟芳諸生詩文俱超逸鈕氏所居爲那塘在馬橋西明萬歷閒自歸安來今支派繁衍稱詩禮

家

上海志

吳世賢字掌平南匯人乾隆六年拔貢舉於鄉十年登明通榜十三年成進士選安化令調沅江屢攝繁劇題靖州牧被議捐復發往湖北檄署州縣築鶴峯地本土司舊治言於學使周紹南

奏設學額補武昌攝咸寧縣興國州旋以杖悍卒註誤

高宗純皇帝東巡恭進詩冊蒙

恩復原官授密令奉母諱旋里服闋補樂昌以年邁乞休

將歸卒於粵世賢工詩古文辭制藝尤精宦游所至課士如子弟性剛直不阿上官在粵時曾按大獄釋株連者四十餘人咸以沽名譖之李中丞湖覆勘皆如所讞

云

朱文正公撰傳

沈湖字鏡涵華亭人居漕涇父日贊能書工畫山水湖雍正十年舉人真草隸篆各擅能事沈尙書德潛極重之乾隆十三年進士以一目眇需次補潁州府教授歸田後廣西巡撫李錫秦聘赴黔中主講秀峯書院歸仍館張溪汪氏從游甚衆操選政風行遠近卒年七十七所著矜細齋文集海鹽吳懋政序以行世子然乙華庠

生亦以隸書稱

青浦志

黃文蓮字芳亭上海人九歲能詩與王祖趙文哲諸人  
倡和爲吳中七子之一乾隆十五年舉人授安徽歙縣  
教諭丁母艱起補全椒從游者多通顯後爲泌陽令甫  
下車誓於神不欲名一錢有黃青天之名移著唐邑泌  
陽民爭之遂回任又一年卒於官文蓮廉潔勤敏嘗讓  
產於弟樵蘇不爨泊如也著有書傳聯梅道德經注聽  
雨樓詩稿妻曹亦工詩有玉映樓吟稿從弟熙乾隆五  
十九年副貢入國子監嘉慶甲子

駕幸翰林院獻頌冊

命陳設齋宮從子炳章字豹人諸生從妻兄趙秉淵入川  
時勦捕逆匪秉淵守成都承檄鞠黨與炳章再三請宥  
全活頗多兵民有疾者山醫藥療之未幾歸卒

上海志

單乾元字遇春華亭人乾隆十五年舉人知雲南寧洱  
縣邑境南鄰阿瓦苗夷雜處易生釁乾元到官恩撫善  
良威御桀黠四境肅然以母老乞養歸卒著有世滋堂  
集

徐恕字心如青浦人父葵縣學生恕甫母亡葵撫之  
五歲能識字乾隆十六年成進士選浦江令補海寧調  
平陽四入文闈所拔悉兩浙知名士擢太常寺博士遷

宗人府主事充玉牒館纂修典試河南廣西遷吏部稽  
勳司員外郎授湖州知府調杭州晉浙江糧道蕭山被  
水親勘發賑窮黎賴以全活收瘞浮棺數千立義冢置  
田以供歲祭轉浙江鹽道尋陞浙江按察使六月飛蝗  
自海外入錢塘恕馳至海濱教民夫以掘溝捕掩之法  
兩晝夜蝗盡境以安旋丁內艱起署山東布政使值歲  
旱恕布衣草屨步禱泰山甘雨如注百姓遮道歡呼歲  
大稔調署浙江布政使四十四年調山東布政使冬藩  
署失火恕入內取印被焦灼卒事聞

上憫之贈副都御史膺一子逢豫爲主事逢豫字贊齋由

兵部武選司歷官長蘆鹽運使卒於任先官大順廣兵

備道以清謹稱

青浦志

張孝泉字述思婁縣人縣學生弱冠幕游織造圖拉延主章奏圖拉器之趣其試京兆遂入宛平籍舉乾隆十五年鄉試十六年成進士試戶部主事父喪服闋補陝西司主事轉員外郎京察一等引

見記名以繁缺知府用監督大通倉丁內艱服除起原官擢刑部安徽司郎中出知廣東南雄府歷署韶州肇慶兩府權肇羅道南韶連道引疾歸孝泉外和內介無疾言遽色及事關民生利弊輒侃侃不少休郎潛十載勤



慎供職及爲郡守益勵清節粵省素稱雄饒仕宦者不  
數年漸致豐積孝泉在職二十年囊橐蕭然不能自潤  
晚主上洋書院值餉不繼僦屋而居著有退圃詩文鈔  
冷香集錢少詹大昕序之卒年八十一子崇鈞國學生  
能文工詩詞庚寅試北雍闕中首薦不售性豪逸著有  
珠江竹枝詞及詩文稿

妻志

杜昌丁字望之妻縣人麟徵孫父登春爲廣昌令除丁  
糧爲民累者年五十九始舉雄澤州相國陳廷敬寓書  
曰爲廣昌除千丁乃爲杜氏增一丁也故名昌丁中雍  
正四年順天副榜以保舉選浦城令禮賢課士除無名

科敘報最擢永春州知州築衛城壩創書院學舍會泉  
州奸民拒捕大吏議屠戮目丁諫止命署府篆乃單騎  
往諭誅首惡餘未減全活者千餘人以病卒於官貧不  
克歸民賻之立祠壩上以祀焉著述詳藝文志  
徐樞字聖功婁縣人文貞四世孫雍正七年以諸生保  
舉賢良方正引

見發往江西以知縣用署星子縣以廉幹稱尋被劾歸與  
黃宮允之倚顧侍講成天倡和著有玉屏山人樂府詩  
集行世年七十八卒

世德  
紀略

邵成平字庸濟華亭人諸生雍正七年奉

特旨令各省學臣選舉才學優長者備簡用成平與其選授福建仙游縣知縣遷丁州府同知有政聲著有小東文稿藏於家

妻志

吳濬字白沙婁縣人廷揆子雍正七年薦舉孝友端方官廣東新興縣廉明慈惠政有聲弟猷字晴沙歲貢生以好義敦行重於鄉

陸昌齡字魯山華亭人精申韓之學入京師高宮詹士奇重其才推薦佐幕屢辨疑獄會

世宗憲皇帝有旨令公卿至守令各舉才幹之士平陽守樊錢倬以昌齡薦雍正七年引

見授廣東開建縣知縣調新興署德慶州知州丁外艱服  
闋補湖北通城縣知縣以至以循績著乾隆十一年以  
疾歸年七十二卒

殷鳳梧字岳峙華亭人進士雍正七年

詔舉天下賢良方正御史王丕烈薦之引

見以知縣用署福建建陽丞監修縣志居官以清慎勤三  
字自勵上游嘉之歷任長樂寧洋等令以勞得疾卒於  
官

張朱梅字瑞珊南遷人居石碇里諸生元始孫雍正四  
年

詔舉諸生文行俱優者曰無文舉焉陳永康令調永嘉居官清恕去後民思之

葉本字敷南青浦人保平河工築高家堰敘功一等以沿河州縣補用初署上授盱眙時泗六淝等州鹽徒私販中有貧民誤爲戕誘平奉檄按治開釋甚衆新盱邑文廟建書院陞泗州知州水災勘賑積勞成疾總督尹繼善以

同奉

旨授鳳陽府知府尋調河南衛輝皆以廉能著後以失察屬員虧空降山安河務同知下外艱歸值歲祲施粥平

羅收育遺孩鄉黨頌之卒年五十四

青浦志

黃廷颺婁縣人元佳子元佳入貲爲令歷福建漳州同知營捐俸成興梁漳浦令某以逋糧負累卒於官元佳爲歸其櫬漳民服其高義廷颺少負材幹歷官廣西右江道按察使僉事有廉能名予圖璣篤於孝友人無閒言從子圖珖歷官河南衛輝府知府工書善畫尤以山水知名於時

婁志

王元會字仁山婁縣人諸生循例入太學兄早世撫其孤成立歲饑出粟佐有司平糶雍正間郡建育嬰堂元會獨肩其任者五年乾隆元年

詔舉孝廉方正大江南北論薦者凡十七人元曾爲舉首  
入都以年老辭蒙

恩賞給六品頂帶年六十九卒

妻志

瞿衷一字貫儒華亭人諸生孝友敦睦內外無閒言乾隆元年郡邑保舉孝廉方正會丁母憂未及入都平生詩稿經中允黃之雋刪定又有惜字紙五穀說二篇傳於時

葉承點字子異南隄人永年孫以諸生入太學詩學李長吉與張詹事鵬翀錢文端陳羣相倡和乾隆丙辰薦舉鴻博不遇歸里單居一室日夕賦詩必端楷書之自

題曰沂川集其稿藏其族姪孫葉昌芝綠天館中

南隄志

胡鳴玉字廷佩青浦人諸生雍正十二年

詔舉博學鴻詞巡撫高其倬學政張廷璐薦之乾隆元年  
召試報罷既歸弟子日進後以年資貢入太學年八十三  
卒著有訂謫雜錄行世

青浦志

陸榮矩字錫山青浦人太學生振芳孫編修高輿以榮  
矩學行薦與纂駢字類編書成丁父憂不及議敘歸乾  
隆元年副都御史陳世倌疏薦博學鴻詞不赴著有香

林詩文集

青浦志

張鳳孫字少儀青浦人祖德純前有傳父之項官印江



縣鳳孫少英敏母顧欲覩其志詢以先儒當學何人應聲曰學韓昌黎弱冠父緣事被逮走京師刺血書額恩當時有三子之目謂孝子君子才子也雍正十年中順天副榜乾隆元年

召試宏博旋舉經學甲子復中副榜充正黃旗教習得州同改直隸州判清歷福建邵武府雲南糧道後選四川永寧以年老補刑部郎中敷歷中外四十年廉能詳慎所至有異稱居家以恭儉持躬以忠孝訓子弟書法率更平原詩文若干卷藏於家卒年七十八子慶曾官懷

寧縣知縣

小倉山房集

曹培廉字敬三上海人諸生少知名中年棄舉業勤在  
養母有孀妹貧無依迎養於家久而不怠有故方伯之  
孫貧鬻其女解囊贖之爲辦匱具以配其族子某於宗  
祠祭田外增置義田并建本族義冢瘞無後者歲助育  
嬰堂醫藥乳食以承先志援例授中書未任卒生平好  
客耽書嘗輯趙孟頫松雪集倪瓚清閨閣全集刊以行  
世

上海志

喬廷選字國士南匯人由諸生貢成均博綜經史尤邃  
於易曾在浙撫潘敏惠思榘幕中辨論荀虞九家之易  
與宋元諸儒經說發所未發思榘深重之精形家言遠

近爭延致之然非其人不往也著有周易象貫

南匯志

劉維謙字讓宗婁縣人諸生性敦古道讀書精考覈所居左右有二橋顏其室曰雙虹小圃嘗泛舟浙中得句云犬吠孤村月蛩吟兩岸秋狂喜墮水舟行一二里楫師始覺急返舟維謙方徒跣泥淖中掖登舟仍吟詠不輟年六十餘卒著有詩經叶音辨謠

婁志

繆謨字虞皋婁縣人幼貧廢書焦徵士袁熹見其詩勸之學遂從之游補諸生張文敏照薦入律呂館旋告歸終歲貢生謨詩文清麗尤長樂府論者比之姜白石又周本字莘賢婁縣人亦受業袁熹與謨竝以詩文名

婁志

張榮字景桓華亭人由貢生選授崇明訓導進諸生稽  
實行課經義凡所講習皆仿胡安定法務在通經而適  
於用常訪民間義行節烈得二百餘人請於臺使旌其  
門海上民風士行爲之一變期年歸自崇川士大夫皆  
歌詩頌德祠太倉名宦著有空明子集列 四庫全書

存目中

太倉志

徐穎柔字仲嘉華亭人前明主事三重四世孫師事焦  
徵君袁熹舉業外兼工詩古文補博士弟子員試輒高  
等嘗薦舉博學鴻詞以兄疾不赴後以年資序貢家故  
貧然事親能曲盡歡心初穎柔未生時其父以再從姪

穎枏爲嗣枏齒倍長於柔柔敬事之枏卒僅遺一女撫以成立而擇壻嫁之爲人藹然以恭士大夫皆願與之交年六十三卒

徐趙昱字耕心後改名希曾婁縣人諸生性閒淡不求人知熟精史事論古有卓識尤究心濂洛關閩之學手輯朱子羣書要語歷三十餘年而成詳藝文志

婁志

楊陸榮字采南青浦人婁縣諸生著潭西詩集九卷并經學臆參五代史志疑四卷

青浦志參雲陽詩鈔

朱霞字耕方婁縣人歲貢生嘗應鄂文端公爾泰聘訂定南邦黎獻集選高郵州訓導以老乞歸與諸名流倡

和無虛日主壇坫者先後四十年善書尤工繪事著色  
寫生得徐熙筆意著有一拂樓集曾孫紱字芷湄華亭  
廩生工詩文

婁志

徐提命字葭在南匯人居石筍里沈潛嗜學遭父母喪  
孤苦無以自立去學賈又學醫旣冠慨然曰程子六七  
歲卽以聖人爲必可爲丈夫貴立志吾舍儒奚學矣復  
理故業補金山衛諸生歲科試輒首列學使者板鏤其  
牘學徒日進館舍至不能容後生恂恂有矩矱者不問  
而知爲徐先生弟子也巨室徧延諸名士將擇師提命  
與焉酒半命優童侑酒合坐盡歡提命斂容卻之三請

固辭平生孝友甚篤爲學務實踐不爲聲氣標榜之習  
經師人師兩無愧焉以歲貢候選學博著有四書講義  
子周桂周模周炳世其學

唐堂集

陳麟詩字穎傳青浦人兄蔣麟字雲稼縣學生能詩賦  
麟詩爲諸生屢試冠軍聲望出曹黃門一士右曹登第  
而麟詩以歲貢終年七十八同時爲經師有雷長發字  
宸修陸大光字中黃胡黃道字序東張宗昊字果修孫  
俊徵字啓南張璠字魯儒沈懋功字枚臣咸以工詩文  
能教授名而麟詩尤著子梧岡縣學生

青浦志

沈倓字次安婁縣人庠姓趙父之璫諸生有文名倓性

情和厚學行純正從游者甚衆皆顯名於時雍正己酉拔貢生官如皋學教諭訓課生童務敦實學以老乞歸年八十一卒所著詳藝文子家駿歲貢生

妻志

王澄字印川婁縣人諸生性迂僻詩文恣肆自喜嘗館某公所客有言元馮海粟梅花百詠者澄一夕徧和之字皆用古體書讀者舌撟不能下無子晚年寓居湛然庵自號巢居子竹杖簞笠翛然塵外後進以詩文相質輒曰多讀綾裝書當自佳年八十九卒著述多散佚惟梅花詩郡人有錄藏其稿者

妻志

趙和字柳介婁縣人諸生不求仕進著有言志錄焦袁



熹作詩八百言述其梗槩同時周兆龍字印武性孝友  
每讀書至古人遭際危難事輒掩卷浩歎所居在倉城  
西故以西城名其稿蔣天錦字漢襄家居西塔灣博學  
能詩與周兆龍倡和無虛日

婁志

朱之樸字寧周南匯人諸生居石筍里東故號東邨好  
讀古書其文馳驟縱橫而自然法立詩學東坡書工分  
隸品行端方以道自重年八十二卒同里唐宏字韋弦

邑廩生工詩文與之樸齊名

南匯志

黃令荀字竹咸金山人雍正癸卯歲貢父仲昭諸生有  
奇才令荀幼孤貧嘗雪夜負米數十里外以奉母寒冰

裂膚人不能堪而令苟不以爲苦課弟士英萬里極巖  
篝燈講授宵分不輟俱臻有成士英沒弟婦潘守志令  
苟減食膳之所著詩文並有集

焦以恕字心如金山人徵士袁熹次子弱冠爲名諸生  
屢試不售

召試列二等授淮安府訓導在任八年歸卒年八十二以  
恕親承家學以經術爲先中年後肆力儀禮一書取古  
今訓故謹遵

欽定義疏分別成編依內外注而順文詮釋者曰便讀博  
采衆說以己意衷其是否者曰彙說各十七卷歷十五

年而成彙說已付梓入四庫全書存目又有硯雨齋詩古文集藏於家姪紹祖字誠一乾隆二十四年順天舉人官廣東化州知州紹祖幼侍祖袁熹父以敬親聞緒論爲文專發義蘊著有四書廣義二十卷易解春秋味旨及二香居詩文集各若干卷

徐是做字景于婁縣人少孤力學以諸生例入國學恆親王延爲經師乾隆初薦試鴻博辭不受性謙和爲詩力追長慶與焦袁熹黃之雋陸崑曾齊名在藩邸時山東歲饑作憫荒二絕句王見之入請發賑全活甚多是做曰我詩積萬首惟此五十六字爲有用耳著有古春

堂詩文集

松江詩鈔

沈大成字學子婁縣人父喬堂青縣令大成少應童子試學使昆明謝履厚奇其才錄冠鄉校勉以讀書崇古學大成遂研究經史務窮根柢所居列四部書刊本譌闕字體正俗丹黃標識五色爛然而十三經義疏尤爲一生精力所萃其說經易不廢荀虞詩不廢毛鄭書不信僞古文而主伏生今文尤服膺石齋黃氏洪範明義孝經集傳他若九宮納甲天文樂律九章諸術搜擇融治皆有據依粹然有漢經師風與吳門惠徵君棟天都戴翰林震同以通經名學者稱爲沃田先生年七十二

卒著有學福齋詩文集

妻志

金思安字子敬婁縣人幼工舉子業游曹給諫一士焦

徵士袁熹之門由諸生援例入國學試京兆不售晚年

刻志砥行所著詩文益中理要

妻志

陶遠馥字來雍婁縣人歲貢生父若舟客浙之長安鎮

爲仇家所害遠馥年十五辭繼母陸去學拳勇得異人

授卒爲父報讎人方之蘇不韋後母病刲股肉以進爲

文沈思毅力試輒冠曹偶授徒自給范芑野給諫出其

門子保誠號亦堂諸生爲經師有名孫慶元蔭元康元

俱以孝聞保誠疾革蔭元康元嘗糞甘相嚮哭慶元引

左臂自剗和藥以進病尋愈

陳邁晴字春宇隼縣人有雋才爲文異采絕豔乾隆九年鄉試同考官錢塘袁枚得卷首薦闈中定元數日旋以微疵被斥撤棘後枚招邁晴往相持而泣歸未幾卒同時朱宗載字孔陽徐雲鳳字春谷亦以詩文竝負時

望

妻志

顧鴻勳字策名華亭人七歲就傅端坐如成人稍長與同里陸夢野互相砥礪有志正學弱冠入郡庠以選拔貢京師念父母老一應京兆試卽歸絕意進取與夢野益切劘反已之功四子五經而外尤服膺近思錄雖病

甚默誦不少閒當事欲以孝廉方正薦固辭不就卒年四十九夢野字聚奎十餘歲見功過格即行之後覺其中  
有計校意乃罷去遂專力近思錄及性理諸書年二十七入金山衛庠一應鄉試即屏棄舉業與鴻勳潛心  
理學允懷實踐先鴻勳二年卒年三十八學使雷鉉因其友周宗濂爲之請乃合兩人作傳并給額旌之顧曰  
道範長存陸曰純修足式

趙翰字雲垂婁縣人歲貢生官上元訓導善屬文蒐輯雲間人文梓以行世前明萬歷以後諸名家日就湮者賴其以文存人文後並載小傳可備志乘所未及子念

祖念慈竝諸生亦以詩文名

婁志

陸學淵字環川南匯人文旺裔孫教授鄉里所至必留心文獻嘗以縣志缺略輯成副本十六卷以補原志所未及先是未析邑時蔣思永著分邑志諸人皆有功桑梓沙志十卷析邑時蔣思永著分邑志諸人皆有功桑梓而學淵所著較詳

南匯志

趙廷鈞字堯夫婁縣人家貧讀書乏膏火恆就鄰媼紡織處夜讀爲諸生連躋場屋仿陸清獻先生一隅集手輯古文以授學者子萬里乾隆戊子舉人官貴州天柱縣以慈惠稱同時鍾文明字朗庵亦工詩文鄉先哲朱



霞陳崙輩咸稱道之書法得鍾王筆意

妻志

潘鍾皞字西白上海人恩裔孫博學工詩文兼擅書法  
屢空晏如吟聲出戶外尤工長短句與周銓輩相倡和  
子采美諸生文字周鈞皆能詩

上海志

馮祝字夔宣婁縣人少時溷迹廬肆後折節讀書工詩  
文爲鄂文端爾泰所賞識羅致幕下欲處以一官祝謝  
去歸築一樓居於城西之莊涇年八十餘卒著有一樓  
居稿

妻志

姚培謙字平山婁縣人諸生好交游名滿江左雍正七  
年保舉以居喪不赴後數年尙書沈德潛還

劉奏培謙閉戶讀書不求聞達又以其所著

御製樂善堂賦注四卷增輯左傳杜注三十卷經史臆見  
二卷代爲進呈王編修嘉曾以爲通鑑綱目節鈔及類  
腋雖未經進尤其一生心力所萃云所著有松桂堂集  
卒年七十餘

松江詩鈔

陳基字澄宇奉賢人諸生貢成均博學好古兼精八法  
尹文端奏修江南省志基與其選嘗與兄安仁修先世  
兆域重建宗祠增輯家譜生平善事父母不言人過人  
有急難或空乏必排解飲助遠近稱善人年六十三卒  
以孫廷慶貴贈如其官

范穎士字仲和婁縣人嘗應童子試郡守吳節民奇其文擢華亭第一時縣衛之首或一二未稱競造蜚語撫軍劾罷吳下有司按驗每訊必首及穎士穎士曰生不知所謂苞苴竿牘知試文字耳巡撫徐士林時爲司臬集僚屬坐堂皇面試穎士操筆立就徐一閱一擊節命之起穎士趨案前跪曰某等八人文略相等也生獨有膽耳今以交卷獨早得脫而餘人猶未就是以己長入人罪不忍也請同罪徐乃令七人者俱出獄遂解是日也徵穎士太守及七人者幾殆明年仍試第一補博士弟子員益自奮遂略血乾隆五年卒年二十七士林惜

唐堂集參  
之  
年譜

吳成九字和仲南匯人諸生啓秀子同邑王鏞顧成天  
均愛其才省試屢擯乃晝課生徒夜肄經史益務爲根  
柢之學詩法陶韋詞學蘇辛書法李北海生平事親以  
孝交友以直嘗銘座右曰下交不難有威而難有禮平  
交不難有情而難有義上交不難有禮而難有體卒年  
四十八子省欽省蘭並有傳

南匯志

張純熙字仲時南匯人父標歲貢生純熙能詩文並習  
掌故嘗客太倉王慕廣東撫署暮深倚之既入都怡  
賢親王延致藩邸梁園授簡著述甚多後歸卒生平撫

二姪如子弟感之字以伯成伯生俱成名與子均分其產敦本厚族鄉里重之子泰字伯原歲貢生以文名學

訓縣學生

南匯志

顧偉器字成琢上海人布衣嶽奇磊落孝友甚至與劉少伶善嘗學賈折閱耗劉資劉不以爲意而偉器愈益貧且益介惟少伶周之則受神於揲著決吉凶屢中詩極清麗文學眉山畫山水入逸品著有史統華亭陸芝爲之傳偉器少師其從兄偉烈僅烈字作先拔貢生令博野遷安在職廉謹偉烈弟偉度蜚文績學乾隆甲子丁卯兩中副榜

上海志

余谷鑑字人表上海人山陰貢授廣德州訓導幼失恃  
父病刲股以療善事庶母撫異母弟成立族有死亡無  
告者爲之斂不能娶者助之婚有戚某負債被訟代償  
之歲稔倡議賑卹重建浦西虹橋及宋家橋徐家橋官  
廣德時施藥活人署學正捐俸添建學齋敬注

聖諭直解朔望宣講所著詩文同郡凌加煥錢塘陳兆崙  
序之

上海志

唐敬濤字澄之奉賢人年十六補諸生父愛之析產時  
分宅爲三以前屋授敬濤固讓仍居宅後性慷慨施予  
無吝色凡親友以緩急告者必謀所以濟之而償否不

問嘗鬻一婢知已字人趣召其夫歸之不取一錢族有聘妻多年力不能娶者議廢前約敬濤即贈金俾完婚

以高才生貢入大學卒年七十七

奉賢志

汪宜耀字士雲上海人父永安工舉業著翟村志宜耀潛心力學通四書諸經義理著述甚富以歲貢生官舒

城訓導俸滿歸卒

上海志

繆孟烈字毅齋婁縣人先世自江陰僑居雲間遂爲婁縣人少聰穎於經史子集皆能誦習以諸生名於時學使崔甄賞之入太學應京兆試不售抑鬱成疾卒士林惜之同時有朱廷琦字又幹陸鼎字禹蒼奚勗諸字掌

談金柯秀字背讓陳金浩字綱文張晃字漢中衛柱字  
衡峯徐南溟字玉臺張掌絲字綬廷並以高才宿學爲  
後進師以佚其行事不復能詮次云

陸元炳字曙予青浦人請生以能詩稱晚年學益邃探  
索宋儒語錄尤兢兢於君子小人之辨同學之士奉爲  
楷法子江藻號石亭金山衛學生詩才婉麗與任瀚爲  
倡和友金昂亦折行輩禮之年四十七卒著有恆新堂  
詩稿孫承祖官寶應教諭

沈巷志

汪思遵字建士奉賢人以府學生貢入太學性孝友父  
沒哀痛幾不欲生先是父在時愛吳興大觀山之勝期



他日卜葬於此思遠奉遺命往治宅兆時盛夏上下登陟觸冒毒暑心寸交瘁卒以渴死年四十五深山中急不得棺斂三日始斂尸不腐面如生思遠子顯曾字勉哉府學生當思遠赴吳興時子姓數人獨顯曾請從赤日中佐父襄事不辭勞勩思遠死抱尸號哭三日不絕聲遂隕年二十雍正八年以父子雙孝竝邀

旌典

奉賢志

祝彭齡字壽殷南匯人例貢生童時廬舍火母黃臥病不能起彭齡冒火奔救衣袂盡焦負出戶得無恙父患目幾盲日楊數次復明父病甚焚疏禱天願以己算益

親如是一夕遂愈輕財尚義人稱長者子爾和捐書院  
田百畝修學宮魁星閣建橋梁助賑拯溺議敘吏目  
汪嵩年字永祺奉賢人父病危嵩年醵天願以身代父  
恍惚間見神人謂曰爾子至孝今賜爾靈丹卽後園蕉  
上露也飲之果愈郡守王某有孝力回天之旌父詣湖  
州省墓祖母忽遭危疾思食鮮葷徧索不得乃醵天如  
父病時明日庭中樹根生蕈三五取作羹以進祖母服  
之喜病遂瘳先是嵩年少喪母哀痛成痼疾後又哭祖  
母遂嘔血不止自知不起作絕命辭有吾到黃泉無別  
恨惟憐夜哭有高堂之句聞者傷之乾隆四年

旌表

奉賢志

秦秉謙字履吉南匯人貢生嘗捐貲三千二百兩建鄉約所乾隆三年題給州判銜後又捐田入義學及書院中縣署立善人榜書其名

南匯志

范士欽柘林餅師就日所獲必市酒脯以奉其母里黨或以粟帛饋其母堅勿受善體親心雖恆匱乏未嘗乞憐於人母沒葬之以禮雍正閒太僕卿俞兆岳題額旌其門

華亭志

周魯字東山奉賢人國子生考授縣丞居鄉喜讀書樂爲善嘗見里中道殣相望卽捐田貳百弓設爲義冢構

靜觀樓藏書甚富書法似周晚山晚得蘭亭十八跋及  
米襄陽真蹟二種鉤摹入石附置壁間兼工篆刻著有  
靜觀樓印言二卷

奉賢志

李士達字天英上海人父長祿買於楚越閒家漸饒以  
濟人利物爲心士達克承其志建育嬰堂施棺藥給獄  
囚絮米歲以爲常康熙四十七年饑助賑雍正十年水  
溢撈浮尸斂之歲除微行委巷突無聲者輒以銀納門  
隙中終不自言編朱子家禮輯要功過格行世子宗袁  
字式凡官刑部主事出爲廣西梧州府知府葺書院教  
士會年饑米缺撫軍檄賑借撥粵東宗袁不奉檄又嘗

攝鬱林州鑿北流道中石筍四十餘里成坦塗有循卓  
稱以忤上官被劾復原銜居家舉耆年會陰行善事弟  
宗周江西萬年丞攝建昌大庾縣有能聲宗袁絳吏議  
時開關萬里急其難宗袁子心怡字昆和著有竹田詩  
稿心耕字春圃官刑部郎中終湖南岳州府知府嘗平  
反冤獄劉文清壩陸朗夫曜先後撫楚皆器之

上海志

朱之淇字泉左上海人弟之灝字蒼巖之淇兄弟少貧  
以懋遷阜其家內行甚篤幼喪父事母張以孝聞友敬  
終身不少弛撫諸孤姪析家財必均管建宗祠以敦族  
屬遇人緩急不惜仗助乾隆二十一年饑施糜平糶爲

郡邑倡秋大疫捨樓以千計三十二年獨力修尊經閣  
建敬一亭其於善事知無不爲而雅不欲居其名嘗慕  
普濟堂善舉儲銀三千兩屬子姪俟有倡始者助成之  
乾隆戊寅舉之淇鄉飲賓卒年九十陸副憲錫熊志其  
墓有孝義篤行有道君子之目之灝又捐修敬業書院  
增建育嬰堂房舍好賓客日常盈坐與人言諄諄以孝  
弟相勗見人善輒喜不自勝遠近以爲二難卒年七十  
八之淇子朝源字星發仕工部員外郎 封之淇如其  
官之灝以其子森階 封朝議大夫從子朝棟字殿梁  
以其嗣子文照階 封奉直大夫朝相字禮臣以其子

文煜階 贈朝議大夫朱氏累世皆好禮而力於義蓋

之淇兄弟教云

上海志

黃雲師字騶書上海人候選布政司理問父衡松有潛德雲師性孝友撫兄雲章四孫皆成立宗族貧者悉賙之乾隆乙亥歲饑有司勸賑雲師倡議給錢浦東五十二箇貧者大口日給二十文小者半之全活甚衆母壽九十悉蠲佃租有戚友沒赴弔出逋券千金焚之建宗祠築橋梁修道路皆不惜鉅費里中子弟習文藝質穎者曲成之子森諸生贍學能文工楷書著小澣詩鈔從子培蘭例銓理問幼喪父母事繼母祖母均以孝聞叔

父某沒撫其孤若干年祖母未之知恐其戚也任黃氏家事三十年無私財嘉定錢大昕稱爲篤行君子又培鎬如金培桂竝雲師從子能以嫩行世其家

上海志

黃炳字文圃上海人雲師從弟候選布政司理問性行醇慤蚤棄舉業賈於吳門家事屬弟焜經理有幹才喜施與周宗黨之急如恐不及乙亥歲饑承父恆松志捐賑全活甚衆弟焜斫竝早卒焜有文行陸副憲錫熊爲之傳炳子廷瑞焜子原泉焜子堂尙瑜皆諸生堂所著

見藝文

上海志

夏宏時字建寅婁縣人諸生產不及中人顧節縮衣食



歲製棉衣數十襲以給同里之貧者待族姻尤有恩誼  
有不率教者輒以微辭勸勉俟其人悔悟而後已子之  
壻以歲貢仕丹陽訓導

婁志

沈案字衷孚青浦人康熙四十六年歲祲出粟煮粥以  
食餓者雍正五年開濬吳松江每縣各派役夫五千案  
出私錢爲飲食費役得不困又設義塾延師訓里中弟  
子子大經以貢授清河教諭歷官江西泰和縣

李玉如佚其名素履方嚴治家有繩矩門庭之內肅若  
朝典年登大耋猶健步行可十餘里或問以養身之術  
曰七情之中惟怒難制我能不怒而已乾隆十八年屆

一百二歲撫臣以

聞給銀建坊如制

奉賢志

王瑛字若愚南匯人諸生文行兼優潛心理學未嘗少  
自衒鬻爲文鉤元索奧出人意表著有敬勝堂詩文集  
子誠字伯承諸生歷試高等恬雅淵博肆力詩古文詞  
著有香雪園詩文鈔詩話尤工書得李北海米襄陽筆  
意刻有香雪園帖

汪如倫字珊甄奉賢人諸生孝子思遵子也初思遵祖  
國柱兄弟四人明初由新安遷松江百有餘載其宗人  
多貧乏棺掩淺土三十七喪思遵常欲卜地以葬蚤世

不果如倫承父志捐田二十七畝作廣孝阡倣周禮族葬之制大可容百棺先舉未葬之柩安厝而屋其旁以祭祀焉刊立規條鐫之墓門以垂永久云

奉賢志

黃芳字掌公婁縣人年十二母病芳每夜露頂禱於天母感異夢疾愈爲諸生試高等從游甚衆各有以造就之好施予嘗倡建育嬰堂於水雲亭知府劉堯裔旌以經明行修又徐秉烈字怡圃端謹誠樸力行善事乾隆二十三年知府張玉知縣周廷佐舉鄉飲介賓又葉鏗字樸庵太學生考授州同幼孤奉母汪以孝稱鏗家業中落而施予不倦郡有司以賢良方正薦三辭不就

婁志

奚慎字克修南隄人國子生樂善好義歲饑輒助賑族人不能舉喪葬者身任之嘗建石梁以濟徒涉

顧梁佐字萬琳華亭人世居亭林康熙戊子秋潦民飢出粟八百石平糶以爲諸名田倡價遂平雍正壬子秋浦南饑且疫蠲租助賑且買地置義冢焉年七十五卒子有輝字廷煌考授州同知乾隆初年發粟賑飢十九年秋淮民遭水南來就食有輝偕楊錫峒出錢米竝製衣以給之又同邑有盛煥章捐穀助賑亦以義行稱

張忠掌字逸巖婁縣人父澤榕性伉直工詩善書忠掌有三兄幕游已獨承歡供甘旨傭書不給典質稱貸不

令父母知後兩親相繼沒輒對遺像泣月食不盡斗米  
遂卒太倉沈光祿啓元爲撰傳

金文忠字君顯奉賢人居高河堰世有隱德文忠內行  
純篤爲里中所稱邑令周嘗給以額子有仁敦尙古道  
雍正十年颶風海溢田廬被災其宗族親戚及鄰人之  
貧者出己財贍之不足則斥賣田畝以供其費著有  
家言集延名師訓其子遂開後人科第焉年八十五卒

張一籌字昭問華亭人居大五畝出衛學生援例入成  
均喪父哀毀骨立孝事節母能得其歡心性伉爽不可  
以非道非義干有叔饒家財欲立爲後以昭穆不相當

堅不欲曾建大潭諸石梁桑梓有善事無不躬先倡爲之期在利濟未嘗列己名年六十析產畀諸子作生壙并葬其外祖父某子孫率循彝訓皆醇謹能讀書年七十一卒

錢溥義字景方金山人國子生事親孝好施予鄉中告糴者日常減價親戚貧乏者每多周卹累年施藥救效無數戒其子孫奉行勿替里黨至今賴之邑中凡修建文廟橋梁輒首先捐助長子樹本字根堂國子生廉靜簡默研精經史入南北闈累試不售後習軒岐就診者不取酬而多奇效有選刻莊騷讀本行世自著漱石軒

詩草藏於家季子樹立字希成附貢生與伯兄才名相埒藏書甚富

胡廷相字銓陞南匯人居周浦篤於行義唯恐不及乾隆二十年海溢歲饑戚族之凍餒者周其衣食已死者助之殯斂又嘗節縮歲入市地一區置義冢以葬宗族外姻之不克舉者又欲改建宗祠置祭田義田事未竟卒其子宗煜奉母汪遺言亟成父志捐常稔田一百二十畝有零奉先敦族規條秩然嘉慶七年具呈立石知縣張昌運有記

瞿兆芳字德純婁縣人父欽仁華亭諸生早卒兄馨遠

母顧撫二子成立兆芳以貧故棄書業賈所得悉以奉  
甘旨且佐兄讀家稍裕卽以贍族周急焉子應咸字衣  
章乾隆二十七年順天舉人歷官興國州知州張模撰墓志  
徐乾字天倫金山人入青浦庠後改歸華亭孝友力學  
祖母張苦節父有伋欲上其事未果而卒乾請

旌建坊乾隆二十年歲饑與弟日煦首倡平糶并捐助粥  
廠邑令黃旌其門沒後士林追慕陳於學使者曹秀先  
給以善行淳修額子念程附監生以孝稱孫祖鑒由廩  
貢捐訓導歷署蘇常鎮三府竝崑山丹陽事

顧天桂字正鍾青浦人父志耿諸生天桂由太學生例



授主簿乾隆二十二年春

高宗純皇帝南巡獻賦後以父年踰八十眷戀色養遂不赴銓父沒以哀毀卒生平篤友愛敦任卹道路橋梁多所修整又嘗煮粥賑飢著有香蟾詩草八卷

青浦志

宋住謨字聖裔奉賢人里中有二堰曰楊家堰曰嚴家堰兩姓惑風水壩久不開堰內田禾屢遭旱潦佳謨出重資買之開通二堰引水溉田千餘頃上建兩石橋曰人和日時和旣便行者復通舟楫迄今並受其利云陸宏圻字敬亭南匯人母病篤宏圻籲天請代竟不起謂兄沛蒼曰兄爲嗣續計弟將從親泉下矣不食三日

死妻趙氏亦死學使莊有恭給奇行同芳額以旌

南匯志

顧德炳字道源上海人少孤貧母病弟幼艱苦萬狀後爲世父後嗣母蔡孀居勵節性方嚴德炳善事之得其歡心木生母無侍婢德炳手滌溺器十載不懈撫弟承先婚娶承先亦克盡孝恭力建宗祠人推顧氏二難云

南匯志

俞九思上海人父允和病九思籲天乞代既而神示之兆愈又十五年卒子乘御乘時梓孝感篇勸世孫存敬年十七母病籲天乞代如其祖嘗藥滌廁膺母尋愈而存敬以積勞殤知縣劉泝旌之曰暑孝可風

上海志

松江府志

卷五十九

窮

松江府志卷五十九終